

أشعار بالعامية
«تَحْتَ عَيْنَيْهَا اسْوَدَّ»

اسم الكتاب : تَحْتَ عَيْنَيْهَا اسْوَدَّ
تأليف : محمود عدلي
تصميم الغلاف : محمد صالح شحاتة
رقم الإيداع : ٢٣٣٨ - ٢٠١٨

ZERO ONE PICTURES

Production solutions that make sense.

زيرو وان بيكتشيرز للتوزيع - أحمد فخري - مدينة نصر - القاهرة
تليفون : 01285829109 - 01090288777

E.mail: Zeroonepictures@outlook.com

Zeronepictures.com

website: www.zeronepictures.com

© جميعُ الحقوق محفوظة، وأي اقتباس أو إعادة طبع أو نشر في أي صورة كانت ورقية أو الكترونية أو بأية وسيلة سمعية أو بصرية دون إذن كتابي من الناشر؛ يعرض صاحبه للمساءلة القانونية.

« تَحْتَ عَيْنَيْهَا اسْوَدَّ »
أشعار بالعامية

للكتاب
محمود عدلي



Mohamed El Sahhar

«مُفتح»

الكتاب ده حصيله تجارب كتيره جداً .. في منها اللي اكتمل و
في منها اللي مكتملش ..
الكتاب ده لأول تجربه فاشله في حياتك و برضه
لأول تجربه ناجحه ..
و لأول مرتب دخل جييك ..
الكتاب ده ليك لو حاسس انك مُش لايق علي الدنيا !
الدنيا اللي انت عايشها ..
الكتاب ده ليك و لتجاربك اللي انت عيشت فيها
و لو ملقتش نفسك هنا ... يبقي انصحك فوراً
انك تسيب الكتاب ده لأنه مُش هيكون مناسب ليك
عشان ببساطه الكتاب ده اتعمل لكل شخص مختلف ..
و لكل واحد برغم الضحك اللي بيضحكه مع اصحابه
و اخواته و قرايبه و أهله .. حس انه جواه جزء غريب
جزء لونه (اسود هادي)

إلي تلك الأيام ..

التي كنا فيها سوياً ..

لا نفترق ابداً ...

إهداء

«شكر واجب»

أحمد علي

تامر علي

محمد دنيا

عمرو المسيري

هلال الشامي

محمد نصر

رانيا زهران

طارق راشد

محمد علاء ميدو

حسام مصطفى

عُمر كمال الدين

هاني ربيع

Levan kavartskhelia

Oscar Odd

Axel Thesleff

إلي ..

الكورنيش و أيام الجامعه

و السماعه اللي مكنتش بسمع بيها لوحدي
و النوته اللي لسا شايلها في جيبي
و الورده ام ثلاثه جنيه ..
و تذكره المترو اللي جت صدفه ..

إلي الناس اللي قربت فجأه و بعدوا برضه فجأه

إلي التوبه اللي مُش مقبوله ..
ولا زلت أجهل السبب !!

و اخيراً ..

إلي نفسي ..

«#من_المُرسل»

إحساس الفقد بياذيك
الدنيا تملي توريك
إنك تقريباً ولا حاجه
نصيحه من المُرسل
بطل تتعامل بـ (سذاجه)

«تفاصيل»

تفاصيل وشك تظهر صوره
فدبان في الدايه المكسوره
فد تسبب جرح ..
او قطع كبير ف اليد
لو ليك في العد
طب عد الناس ..
و علي اي اساس
بتقول انك صدقت
في مسائل بيان ملهاش حل
لكن بيكون حلها في الوقت
فد ساعتها بيكون الفرق كبير ..
نصيحه لوجه الله ..
بطل تفكير !!

«رساله الي ربنا»

بابا قالي ان ماما عندك
هو ده بجد حقيقي !!
علي فكره
لحد دلوقتي بعثلك ٣ جوابات
ولأنتك ربنا بالذات ..
فانا مُش مستني منك جواب
و مع اني مبحبش الحساب
لكنني بذاكره عشان خاطرك
يا رب انا فاكرك و مُش بنساك
و كل حاجه بنساها بسيبها هناك
بابا قالي اوعي اشوفك مره تدمع
و انا و الله مدمعتش
انا حافظ كلامك علي فكره
تحب اسمع !!
اصلي لحد دلوقت انا مسمعتش
عارف ...
انا عايز اقولك علي سر
انا واثق جداً فيك
لكن دمت اما قالولي

شكلك منكوش
مامتك مُش مهتمه بيك !!
يا رب ..
لو ماما قدامك
قولها تهتم بيا
و تسأل عليا
نفسي تجيلي المدرسه
زي صحابي
و تساعدني اروق دولابي
عشان انا مبعرفش !!
انا راجل جداً مبخافش
لكني ساعات ف الضلمه بخاف
و نفسي ماما تحضني ..
متزعلشي مني اصل انا رغاى
و مُش عارف ازاى !!
مع اني مع صُحابي
مُش بتكلم كتير
سلام بقا عشان بابا جه
أه صحيح .. نسيت اقولك
علي فكره !!
انا الدغ في ال (ر)

«مُش زي الناس»

كانت قاعده بس بتسمع
قولتلها كلام مـِـالـِـي بيوجع
فين الغيره و الاهتمام !!
انا مُش حاسس بالحـِـب في كلامـِـك
هو انا مُش راجـِـل قـِـدامـِـك !!

انا طول الوقت لاقـِـي برود
طب هو المفروض
تـِـحـِـبـِـني فرض عين !!
ما احنا الاتـِـنين مـِـجانـِـين

عاشقـِـك بـِـغـِـاء ..
تـِـقـِـلب بـِـخـِـناق
بـِـس بـِـنـِـتـِـصـِـالـِـح

حبيبتني ...
هو احنا ولاد امبارح !!
لأ ده احنا قدام

تشهد مزيكتك و الأفلام
افهمي !

مفتاح القلب - اهتمام
مفتاح البعد - تجاهل
مفتاح الروح - احساس
و اللي مضايقك و باسطني

انك مُش زي الناس ..

«عندك إيه ؟»

– عندك إيه ؟
وجع في الروح :
خلاص هتروح
و تبعد عن اللي في يوم باعك
و تكتم كل اوجاعك
و متكلمش !

– انا عادي !!
بلاش تكذب و متمثلش :
و تعمل فيها مُش مهمم
شكلك أكيد زعلان
في حد زمان أكيد خانك
بتحرقه دايماً في دخانك

و ساكت ليه ؟

– انا عادي !!

كذاب ..
بتسرح في اللي ضاع منك
بتتحسر ..
و حاسس بيك و متأثر
سنين شايفك بتتكسر ..
و قلبك شكله بقي غامق ..

بذمتك ..
مبتملش من الوحده
ولا التمثيل ؟
مبتملش من الضلمه
و هدوء الليل ؟

— انا عادي !!

بتهرب م الكلام و الناس
و بتلوم نفسك علي غيابك
بقالك فتره قافل بابك
و عُرْله و ضلمه و سجاير
بقيت حاير .. و كل ده ليه ؟

– انا عادي !!

طب اِحلف اِنك لسا مش تايه

و بتفكر !! ...

و بتسمع كل أغانيها
و مش عارف خلاص تنسي

ولا عارف تنسيها ..

حكايه بقالك ياما ..

بتحكيها !!

بقيت كما بيت

لكن مهجور

مشافش الراحه

مشافش النور

صدقني ..

لازم تبطلها ..

– انا عادي !!

كفايه عليك بحق الله
و بحق سلسله هديه
و بحق كل أغنيه
سمعتوها ..
ف حنيتوا

تعبت .. ف غبت ..

و نسيتم !!
ف حاول دلوقتي تكون احسن
و ابقني طمني عليك ...

– انا عادي !!

«اشترى نفسك»

احساسك الحلو مبيفضلش
الكلمه الحلوه مبيتقالش
الا علشان بتصالح !
كام مره حلفت تسامح
كام مره اخدت قرار
انك لازم تختار
ولا تجبر نفسك علي حاجه
تتعلق دايمًا بسداجه
و صعبت عليك القول
و كرهت ساعتها الشوف
و بعيد عنهم علي طول
عندك أزمات و ظروف
و بتبكي بدون أسباب !!
فكرتك التافهه المعقوله
و كلامك ع الدايره المقفوله
قفلت ابواب ...

كام مره سقطت في الاملا
كام مره وقعت ع الرمله
كام مره صحيح حبيت
كام مره زهقت و مليت
و ابوك قالك انك خايب
كام مره خسرت ف الشايب
فلعبت جاكات
كام مره عاكست بنات
و قلبك ببص عليك
كام مره جيت تتلفت
ملقتش الناس حواليك
كام مره حلفت تعافر
نفسك تهرب و تسافر
ف تقوم مخضوض م النوم
كام مره فشلت صحيح
تفشل و تقع و تقوم
كام مره عاندت ف أيامك
و خسرت بعندك احلامك
و حلفت انك متعيشهش

تليفونك مليون ارقام ناس
لكن مبتكلمهاش !!
حسيت كام مره انك مخنوق
او كنت معاها خايب مدلوق
انجازاً ليك

لو كان بصحيح قلبك بيشوف
و متأكد ان الناس كرهوك
فاشتري نفسك لو أمكن
علشان ممكن يبيعوك

«وَاهْ يَا وَلَاد»

وَاهْ يَا وَلَاد - راح الف بلاد
انا راجع - لكن بميعاد

امتي فيوم هنكون ثوار !
نتحرك علي صوت النار
اخذوا بيوتنا الاستعمار
حتي الحلم اهو داسوا عليه
امتي فيوم هنكون احرار !
امتي بأيدنا اخدنا قرار !
كل ما تيجي عند الدار
خُذلك طوبه عشان تبنيه

وَاهْ يَا وَلَاد - راح الف بلاد
انا راجع - لكن بميعاد

يا بهيه كلك قراطيس
و الباشا خلف الكواليس
يوم الجمعة يبقي خميس
لو يأمرنا سعادة البيه

باعوا الأرض و بالمجان
هتكوا العرض عشان غلبان
أه يا بلد فيكي التعبان
يقفوا في صف
يبوسوا أيديه ..

و أه يا ولاد - راح الف بلاد
انا راجع - لكن بميعاد
قالك ثوره وقالك جيش !
و الفرمان نازل بشویش
اوعى ف يومها تقول معيش
كلمة سره هي (جنيه)

الفرصه دي - أكيد عايزاك
لو هتهاجر - خُدني معاك
إن شالله اروح اغني وراك
حب بهيه فادني بـايه !
غير انه خلانا بـعاد ..

و أه يا ولاد - راح الف بلاد
انا راجع - لكن بميعاد

«متدمعيش»

متدمعيش من التجاهل
و نقص الاهتمام
انا أصلي كنت جاهل
و معنديش خبره في الكلام
و متدوريش علي سبب
او مُبرر للي انا بعمله
و متسألش ليه الطريق ده
اخترت اني اكمله !
و متكرريش كلامي ليكي
لما بغيب عشان انا بوحشك
و متخليش الاكتئاب جوا منك يحبسك
و متزعليش مني لما كنت بعلي صوتي
و انا دمي ساعتها فاير
و لما حببت سكوتي
و لما رجعت للسجاير

و متنكریش ..
انِي اعجبت ببتفكيرك
انا عمري ما صدقت بنات غيرك
لكنني فجأه كرهت الناس
و علي اي اساس
قولتيلي خليك معايا !!
انا عايش اصلاً ب اتنين جوایا

حاولت افهمك ..
بأن الدایره مقفوله
و بخاف من اُمنّا الغوله
و بخاف جداً من صورتها

حاولت افهمك ..
انه في حاجات تتنسي
و حاجات مبتنسيش

و حاجات تتحكي
و حاجات مبتتحكيش
و حاجات أكره اجيب سيرتها
انا عارف أَن الحُب ماهواش عيب
لكنني حقيقي بخاف مـ الغيب
ونا مُش عايز اظلمك
او افتتِك او اقسِمك
إنتي لوحه جميله فعلاً
بس خايف .. أرسمك

«رَبطه غريبه»

سُبْحان من خَلِي
في ربطه غريبه
بيني و بينك

نبعد .. نتلاقي
تُحلمي بيا
احلم بيكي

نتقابل صُدفه
و عيني فـ عَيْنِكَ ..

سُبْحان من وصلِ إحساسي
خلاني اقول اهلي وناسي

و اِنِي اعرف مالِك
و انا حتي بعيد

سبحانه من بعد الفُرقه
ادانا مواعيد ..
سبحان من خَلِيَ البُعد طويل
لكن إحساسنا ملوش مسافات

سبحان من ساب للقلب دليل
و كلام متقسم علي فترات

سبحان من خلاني ابعد
فالايكي بتيجي و مشتاقه

دلوقتي بس انا متأكد

لو مهما بعدنا ...
هنتلاقي

«زي ايه !»

اما انا .. انا زي ايه !

انا زي بيت مهجور
عمره ما شاف النور
انا حد طمعان يشوف عودك
و ساعة الجد
انا جندي فجنودك
مستني ييجي عليه الدور
و بيحبك
بس انتي اللي جيتي عليه

اما انا .. انا زي ايه !

انا زي واحد خاين سجين
و تهمته مخلص أمين
حزني مكتفني حالف لينسفني
و غلطتي اني بفكر فيه

اما انا .. انا زي ايه !

بالنسبه ليا ..
الخوف اساساً كافر
ملوش مله ..
إزاي تروح و تسافر
و أنت اللي فيكِ عله !
انا صوتي محدش حس بيه

اما انا .. انا زي إيه !!

«لقد نفذ رصيدكم»

عن الحبِ اللي مُش نافع
عن سؤالك و إيه الدافع ؟
و اغانيك و الصور والذكريات
و عن حلم – فات
و عن قرايبكِ اللي جُم عزوكِ

عن اخوك الصغير
اللي شافك ابوك
لأن ابوك من فتره مات
عن آخر مكالمه و آخر شات
عن الغيرهِ اللي كانت جواك
و فشلت بتمثيلك تخفيها
عن لخبطتك في وشوش الناس
و لخبطتك في اساميهها

عن البنت اللي عايز تنساها

ببنات ...

عن صورك علي سلم الجامعة

عن صوت ضحكك مع صحابك

و عن غباء واحد سابك

و ع بنت محبتهاش

بس بتوهمها ..

عن عفواً لقد نفذ رصيدكم »

ف تقوم تشتمها

عن غلطك في حد

و الـ (حد) سامحك

عن نفسك لو فاكر ملامحك

عن عياطك وقت جرحك

و عن نعمة النسيان

عن فكرة التفاصيل

و عن براعة التمثيل

و عن الوجع اللي جوا

و يومها بان

عموماً ...

الناس ماهيش ساكته

فمُش لازم تحكي كل تفصيله

وإن جالك الإِجبار

يبقي ساعتها إعملها بجميله

«براءة»

و بعد الإِطْلَاع
علي كل التحقيقات
و بعد اما رقصوا
علي كل اللي مات
و بعد الانقسام
و بعد الفئات
و بعد ما قرينا فاتحه
علي كل اللي فات
و بعد ما قولنا كلمه
مكنش اصلاً ليها عازه
و بعد الجريمه
و الثوره العظيمه
و الخطبه الفخيمه
و بعد الجنازه
و بعد الإِطْلَاع
علي اقوال الشهود
و بعد الاستماع
لكذب ملوش حدود
و بعد ما قولنا حاضر

و تعبنا من المحاضر
عشان ولاد الأبلسه
سمعوا كلام اليهود
قررنا احنا القضاء
و تهمتكم هي الغباء
الشعب هينول جزائه
ع الثوره و عن غبائه
و لأنه مكنش ذوق
لما طلب الحقوق
فبراءه للرئيس
و لظباط البوليس
و اعدموا كل اللي ثار
و اللي قال صاحب قرار
و اللي عايز يبقي حر
نتزرعله في حلقه مر
و براءه للشاويش
و هديه لابن سالم
و اسجنوا اي عالم
و اقتلوا اي حالم
و حطوا حلمه جوا كيس

«الغربه هي الدوا»

شرح النايات
و الغناوي و الحكاوي
و ضحك البنات
المغريه و ساعة العصري
الضحكه ليها الف شاري
و الحزن كان حله السكات

مكتوب عليك يا طير
تسرح في أرض الغير
و تغني ورا قضبان
العشق للمساكين
و الحكمه للمجانين
و حريتك كانت
مرهونه بالسجان

الغربه هي الدوا
و الذب ده بذنين
لو عايزه نبقي سوا
انا مُش هعيش مسكين

وريني ايه فاتك
وريني فين بيتي
كاره انا سكاتك
و سكرت بنبيتي

شيلتك علي كتافي
و الطلقه جت فيا
و حلفت في هتافي
ل تشوفي حريه
و حياتي ما تخافي
يا بلادي يا بهيه
قبل اما اموت
هصلي فيكي ركعتين

الغربه هي الدوا
و الذنب ده ب ذنبين
لو عايزه نبقي سوا
انا مُش هعيش مسكين !!

«الساعه واحده»

الساعه واحده
الناس واحده
الروح جاحده
و الصوره بتقرب
مستشفى المجانين ..

الساعه لفت
الناس خفت
عينك رفت
جواها انين ..
كمانجا و عود
بيحكوا الموضوع
شكلك موجوع ..
ثم ماذا !
ثم إن
ثم كي
ثم حتي
لينا ذكرى
ف كل حته ..

بتقول هنسي !
كذاب .. بتعاني
حبتني لدرجه إنها
« لبست قمصاني »

تفاصيل بيننا
من كتر عياطي
صوتي بقا منبوح ..
إنتي إللي نسيتي
الباب مفتوح ..

انا بعد بعادنا
حكيت لأصحابك
انا بعد ما شوفتك
قافل بابك ..
احضني ضلي
قربي مسافات
انا سايب فيكي
ياما حاجات ..

انا سايب
قلبي ..
وولا عتي الزرقا
انا لما حضنتك
حضننا كان « سرقه »
يوم ما سبتك مكنتش اعرف
إن قراري كان خطر ..
طب ليه كل اما اقابلك
كان بيبقي في مطر؟؟
لما انتي حلوه ف الصور
لما انتي بتحبي الشتا
طب كنتي ليه متشتته !!
لما انتي عارفه اني غير
لما انتي عارفه اني بغير
كنتي شايفه ليه مشاعري
عليكي كثير !!

«ديجا فو»

هو انت فاهم كلامي !
المشهد بيتعاد قدامي
- يعني ايه !
يعني الحاجه تقريباً:
بتحصل أكثر من مره
انا شايف المشهد من بره
- وضع اكثر !!
انا حاسس ان كل حاجه بتتكرر
حتي الحلو بقي طعمه ممرر
كأنك حفظت فيلم لأن عينيك كام مره شافوه
- انا عرفت ..
دي تقريباً حاجه كده اسمها (ديجا فو)

حاولت كثير أقرب منها

ولكنه

اَكَلِمَهَا كثير عني

تَكَلَمَنِي كثير عنه ... !!

«فراق ديسمير»

يا ناس ياللي هناك ساكنين
في بعادكم احنا خلاص تايهين
وحشتونا – وحشتونا
ولا كنا في يوم نعرف
قيمه اللي في ايدينا
ف سامحونا – سامحونا

ياما نفسي دلوقتي نودعكم
مكنش قصدنا ننسي
مكنش قصدنا نبيعكم
أسفين بجد ع الفرقه
أسفين بجد ...
أدينا بنبكي و ب حرقه
و بقينا خايفين نودع حد

سبتونا ليه علي غفله !!
بنتمني نشوفكوا لو مره
أسفين بجد ع الغفله
حقيقي الوحيد دي مره

يا سكان السما ردوا
عقولنا مالبُعاد صدوا
و خافين
ماللي شوفتوه نشوفه

بنبكي عليكم بدل الدموع دم
بنبكي و نشتكي ماله
و نقعد ع الأرض في الضلمه
بقينا ندعي لو نقابلكم
صدفه في الأحلام
بقينا ندمع لما تيجي سيرتكم
باي كلام ..

كلنا هنموت
و مفيش ولا حاجه مضمونه
يا ناس ياللي هناك ساكنين

وحشتونا – وحشتونا

«بروبوفول»

المهدئ والمنوم
و ركن هادي في المكان
القرار إلي انت خدته
تبقى وحدك من زمان
و الحاجات إلي بتشهد
علي دمعتك و صوت عياطك
و البنت برضه هي هي
إلي شهدت علي وفاتك
الكوتشي المقطع
و قلبي القماش
و جرحي إلي لسا
ملفوف بـ شاش
و ضحكتها
إلي في ودني
و الذكري
إلي بتاخدني
و قميصي
إلي صاحبي اداهوني ببلاش
الورده السوده إلي في جيب الجاكته
الحزن إلي باقي في كل حته

البلياتشو اللي ضحك الناس عِلافيه
عربيتك اللي راكنه في صف ثاني
البنّت اللي عاشت عشانك تعاني
المشهد اللي شوفته الف مره
و لسا برضه بتضحك عليه
الجزمه الجديده
و الاسره السعيده
و سجايك الكنت
القهوه و الشيشه
الضحك و العيشه
و حُبك اللي عاش
لنفس البنّت ...
القطر و المترو
و جروحك اللي كتروا
الصُحبه واللمه
و آخر المتمه
و حيد

(١) بروبوفول مهديّ قوي المفعول و له آثار جانبيه شديده و
كان سبباً في وفاه (مايكل جاكسون)

«لعل له عذراً»

هي الحياه ايه !!
رحله ..
و هتبقى أحلي
لو نمت من غير تفكير
لو بطلت تحسبها كتير
و كل حاجه تاخدها بجد
و متتعشمش ف حد
ولا بسهوله تسلم
ولا تحسسهم ابداً
انهم يستاهلوك
و عاملهم زي ما بيعاملوك
و بلاش كتر السداجه
و بطل تحكي كل حاجه
مسيرها في يوم هتتقال
الحُزن مُش غلط ولا حتي عيب
بس اضحك عشان ميقولوش كئيب
ولو اتوجعت من حد
متجريش ع الاكتئاب و النوم
معاش
لعل له عذراً و انت تلوم

«إلي بابا»

إلي بابا ...
انا عايزه اقولك سر
وانا عارفه انا سري ف بير
انا بحبك جداً علي فكره
و عليك من عيني بغير
... عارف
انا نفسي جوزي يشبهلك
ولو زعلني اندهلك
و فيك اتحامي مالدنيا
و ياما كنت تسمعني
و لو اتوه ترجعني
و ياما كتير بتنصحني
و عمرك مره ما تجرحني
و دايماً شايطني ف عيونك
ولو نزل تصالحني ..
و لما اتعب ..
اشوف في عيونك الخضه
و تجري بسرعه تتوضي
و تفضل جمبي تقرالي م القرآن

طب في إيه تاني ا قوله كمان !
بتنسي مني كل حاجه بتضايقك
و في ثواني .. تسيب الدنيا علشانني
بتبقي معايا عصبي ساعات
لكن فعلاً بتنسالي حاجات
و كثير جداً تعديها
و اكثر كلمه بموت فيها
« انتي اللي طلعت بيها م الدنيا »
فيكي مني ضحكيتك
و فيكي مني حاجات تانيه
بموت في كلامنا و هزارنا
و لما نخبي علي ماما أسرارنا
و ساعة المشاكل بنتفاهم و نتصاحب
انت ليا ..
كنت أب - كنت أخ - كنت صاحب

«لوحة اعلانات»

أبوكم ماله !
ابوكم مات
فين وازاي !!
علي لوحة اعلانات
يعني ده انتحار !
أيوه انتحار
طب ليه !
من كتر الشيله
و م التفكير
و من كتر حاجات تانيه كتير
من كتر الزحمه و الخنقه
من كتر الضغط و الزنقه
من كتر الحقد و كتر الغل
طب ايه الدافع و ايه الأسباب !
كان اول واحد حاضر
و كان اول حد غياب

ف يلعن أبوهم عشان الظروف
يعني إللي اعمي ده ممكن يشوف !

يا بايع قضيه .. يا سارق تكيه
سياسة جنابكم .. سياسة يهود

يا بايع بنادق
يا كادب وصادق
يا ناصب خنادق
مسير الحقوق دي
ف يوم راح تعود

ف أمن حياتك
و اجل وفاتك
و سرح بناتك
عشان الفلوس

اتاري البلد دي
بتنسي إللي عاش
و جرحك ملوث
ف لفوه به شاش

فابدأ جنونك
و يخطفوا لونك
و تروح بلاش !!

يعني هي العيشه مُره !
يعني برضه انتي مُصره !
انا كل الي عايزه تبقي حُرّه
و يبقي الوزير زي الشاويش
يعني هي الحريه مُش لنا !
يعني خلاص م الظلم فاض بينا
طب مين قاعد و مين هيغور !
و مين جاي عليه الدور
و مين مكتوبله فيكي

يعيش !!

«أمي سابتني فجأه»

انا امي سابتني فجأه
مشيت في نُص الطريق
من ساعة لما راحت
مُش عايز اي شئ
كان نفسي تبقي جمبي
تُحضني وقت تعبني
كانت عارفه اني مُتعب
كانت عارفه اني لِعبي

سبحتها و سجادتها
لسا في نفس المكان
و صوتها لما تنده
عليا وقت الأدان

نصيححتها عن صلاتي
و أخذ بالي ف حياتي
و دعوتها الي لسا
ماشي بيها للماتي

و خلاص مفيش اصحاب
انا رافض أقرب لحد
الناس بقت أغراب
و مُش واخذ الدنيا جد

كانت امي و كانت حبيتي
كانت بترد ليا غيبيتي
و كانت بتخاف عليا ..

فهمتني وقت ضيقتي
كانت حافظه طريقتي
كانت عارفه اني دايماً
مُش قد المسؤليه

انا لما قالولي اجمد
هتموت كده بالبطئ
قولتلهم امي سابتني فجاء
و مشيت في نص الطريق

«اقتل نفسك بهدوء»

ملامح حزن في الصورة
تذاكر سيما كانت ضايعة

و حتي الفازه مكسوره
و حتي الوحده مُش سايعه

سريرك ملم الجته
بتتقطع ل ١٠٠ حته
و شرخ الحيطه قدامك
و صورتك عليه ..

رميت الدوا الي مكتوبلك
و رجعت للسجاير

مبقتش تعد الخساير
و بتسمع (حب ايه !)

إِذْمانَكَ لِلْمُهدئات
خلاك تشوف القميص جاكته
قطعت كام مره الروشته !

اظبط منبهك ع الساعة ٦
و كل شئ هيبقي تمام !!

و بدون اي كلام
أربط الحبل كويس
و اتكلم في التلفون

بلغهم انك راحل
هيقولوا عليك مجنون

فإضحك علي نفسك جداً
يمكن علشان الكون
مقدرش يوصل إحساسك

او يمكن علشان إنت
معرفتش اصلاً مين !
او مين واخد وشين !

فإِستني كمان ساعتين
يُمكن هتغير رأيك
و تهاجر مثلاً برا

هو انت وقعت صحيح كام مره ؟
او مين كان واقف جمبك

او مين عايش علشانك
لساك حاسس بـ مكانك ؟

طيب ده كويس جداً
كمل الي انت بدأتَه

و الوقت اللي انت سرقتَه
هيكون ضدك في الآخر

بتسمي اللي انت عملته
الحزن العادي الساخر !

طب جرب لو كان عقلك
ينفع وياه الذوق ..

بس حاول علي قد ما تقدر
تقتل نفسك بـ هـ د و و و و

«تشهد عليك»

كل حاجه شهدت عليك
بتحلف و متأكده
طب مين يشهد كده !

يشهد ميدان السيده
و السواري و الأعمده
و البنتِ اللي عاكستها
فزاد خوفها
و مشوفتش منها
غير كعب الجزمه
و شفایفها

تشهد عليك
القهوه الساده
و المرُ اللي بزياده
و الضحك و قت العزا
اللي انت مخبيتوش
و عينيكِ اللي مبيشبعوش

تشهد عليك
سهرتك مع صُحابك
و لما بررت لغيابك
و ضحكت لما حلفت
فمصدقوش ..

يشهد عليك
الحلم اللي انت حلمته
و متحققش
علشان بتقول دايمًا
معيش

و انتهي بالوقفه علي النصيه
سجاير و حشيش
و حلفانك انك هتصلي
و مبتصليش

يشهد عليك
و عدك ليها
و لعبك بيها
و طريقة نُطقك لحروف اساميها

و ما الغيره عليها في خناقه
ضربت - اتضربت - وقعت
و من اول لحظه طيش ف خلعت

تشهد عليك

نفسك ..

إللي إتكسرت ١٠٠ مره
من جوا كمان مش من بره
و قريباً جداً هتهاجر
لأنها كانت فعلاً مضطره

«الحُبُّ حرامٌ»

الحُبُّ حرامٌ
و الحُبُّ اغاني
و الناس بتعاني
و كلنا عُشاق
معظمنا المبدأ عنده
نفاق ..
قدامهم جنه
و قدامهم نار
و الناس أحرار
و العدل ميزان ..
عُقدة خواجات
بُعد و مسافات
الخاين عاش
و المخلص مات ..
الدنيا خنيقه

و الحق - حقيقه
و الفرض لزوم
و الناس دائماً
في العايمه تعوم
الدين بيدله
و الكفر يضلّه
و إن قاموا يصلوا
بيصلوا جماعه
الدنيا عيون
و ساعات شبابيك
و أنت بتتفنن
في ماضيك
و سُكّاتك
كان شئ إجباري
و كأن الوجع المتداري
بقا كله عليك
و مداري ده كله

في موباييلك و سجايرك
و عمايلك و فايدك الساعه
فشلك علقتة علي الشماعه
و قعدت خلاص ع القهوه
يعني

تأكيد النظرية بينجز وقت
فلو حسيت انك مُش مبسوط
يبقي النص الأول مات
و الثاني خلاص « هيموت »

« صديقة العمر »

الصُّحاب مبيتفارقوش

بس بيتلاقوا

انا اللي كان بيضايقلك

بمسك في خناقه

اعجازنا في اننا

مُش دايمًا متفقيين

لكن عارفين

ان احنا اخوات

و اصحاب

حافظه بيتك

زي بيتي

مفتكرش انك نسيتي

ميعاد ما بينا

او عيد ميلادي

ده انا وقت تعبتي

كنت بلقاكي قصادي

طب فاكهه صورنا ؟
لايكات و تاجات
و هزارنا في كومنتات
و كلامنا في سيرة الناس
و مين فرکش مع مين
و مين لمخلي بـ عين
و مين شوفته بيضحكلك
و بحب جناني معاكي
لما نبوظ شكلنا
و ننكش شعرنا و بنتصور
و ساعات في مواقف نتهور
و بنتجنن - انا بتطمئن
علشان ويايا - خليكى معايا
انا ...

من قلبي حقيقى بفرحلك
انا مُش محتاجه اشرحك
لأنك دايماً فاهمانى
و اكر من نفسى عارفانى

دي عشرة سنين
مُش من يومين
و دي مُش سهله
حقيقي بجد مستاهله
إني اقولك قلبك كبير
ف سامحيني علي التقصير

انا أسفه غلطت كثير
و عديها ده لو مسموح
يا صديقة العمر ...
في حاجات منحسش بقيمتها
غير لما تروح
و حاجات بناخدها من الدنيا
ب طلوع الروح

« عيونها طريق »

بشوف عيونها طريق
سكه و بمشيها
و الدنيا لما تضيق
تحضني ، اتوه فيها

.....

عودك بيتمايل
و انا جليبي يتحايل
بغني ونا مكسوف
و ابعثله في رسايل

.....

قلبي ماهوش مفتوح
بتفهميني ازاي !!
بتردي فيا الروح
و تسكريلي الشاي

هوايا قواكي
عاشقك بدون اسباب
سألت كيف انساكي
بصولي بأستغراب !!

«سبحان الله»

سبحان الله
القرَد اتحول انسان
الله الله
يكذب و يخون و بيتخان
و يا حول الله
يقلب في الشده الغلبان
و في الآخر يصبح مجروح

العقل بيحلم مُش بيخاف
لكن الانسان دائماً خواف
يكتب برُصاص
بعديه بالجاف
و بيتعذب في طلوع الروح

سبحان الله
العقل غريب

الله الله
يعقل و يخيب
و يا حول الله
ما اهو عارف العيب
لكن يغلط بـ حلاوة روح
بتشوف الدنيا كـ زار
و بتدي الناس ادوار
و تحس انك بتطير
بتسمع انغام و منير
و تحب تملي القهوة
عايش علشان الشهوه
ولا علشان الجاه ؟

سبحان الله
الطبع بليد
الله الله
العنف وليد
و يا حول الله
تغلط و تعيد
و قلبك بقا عفاريت ساكناه

لما تلاقي الدنيا معاك
تلقني الناس كلها عايزاك
فبتهرب علسان مليت
ولا عشان مستنبي قضاك !
سبحان الله
لو خيط مقطوع

الله الله
تغرق في دموع
ويا حول الله
المرغوب - ممنوع
مفتاح الحزن
في قوله (أه)

سبحان الله

«طبقاً للوضع الحالي»

الحُبُّ له مليون طريق

فبتلقي بَعاد
و بتلقي عِناد
او تلقي كلام ..

« الحُبُّ غرور »
داير ما يدور

فبتضحك علي نفسك
او تزعل فتنام ..

الحُبُّ انِ انِتي
تحتاجي احتاجكِ

اضعف .. فالجألك
واتوه فملا محك

تغلطي فاسامحك

واعدي كثير ..
الحُبُّ إنِ احنا ندندن
احلي اغاني الأفلام

الحُبُّ إنِ إنتي تغيري
ده لأنني ببص لغيرك

الحُبُّ إنِ اعشق ريحتك
حتي طريقة تسريحتك

و طبقاً للوضع الحالي

انا عاجز عن تفسيرك ..

«لو حابه نتراهن»

عایزانی اکون اِزای !
عایزانی اکون نسای

ولا اکون ظالم !
عایزانی الف اکون

ولا اکون مجنون ؟
ولا اکون حالم !

فاکرانی اِنی ضعیف
علی حملنا الراهن

حملک ده شیلته سنین
طب حابه نتراهن !

«محتاجه تركيز»

الطين و الدود
و الناي و العود

كلها اشياء
محتاجه تركيز

الدنيا علينا
هتلف تدور

و نشوف فالضلمه
و نتوه فالنور
و فالآخر نصبح عواجيز

«لكل مكتئب نصيب»

لكل مكتئب نصيب
و لكل شئ كان فيك غريب
و لكل حاجه عشتها
و لكل حاجه عشقتها
و لحبيبتك الي انت طمنتها
بأنك عمرك ما في يوم تسيب
و سبت - فإكتئبت

احب اقولك ..
لكل مكتئب نصيب

«الْصُّدْفَةُ بِتَلْعَبُ دَوْرَ الْمَسْكِينِ»

الْصُّدْفَةُ بِتَلْعَبُ أَحْيَانًا
دَوْرَ الْمَسْكِينِ
بِتَجْمَعُ أَحْبَابُ كَانُوا مُتْفَارِقِينَ
فَ تَشُوفُهُ تَمْسُكُ نَفْسَهَا
وَقَوْلُهُ «إِزِيكَ» ؟
فَيَقُولُ زِيكَ ..
أَنَا بِجَدِّ تَمَامٍ
فَاكْرَهُ الْأَفْلَامَ ؟
فَاكْرَهُ الْمَزِيكَ وَالسِّيْمَا
أَوْ نَكْتَهُ قَدِيمَهُ
قَوْلُنَاهَا وَإِحْنَا بِنْتَمَشِي جَمْبِ الْجَامِعَةِ
فَاكْرَاهُمْ وَلَا أَعِيدُ سَامِعَهُ ؟؟
وَكَالْعَادَةِ .. كَالْعَادَةِ
مَلَقْتِشْ مِنْكَ غَيْرَ دُمُوعٍ وَ سُّكَاتٍ
وَإِهْتِمَامٍ مِنْ بَعِيدٍ لَبْعِيدٍ
لَا قَابِلَهُ إِنَّكَ تَحْبِينِي

و لا قابله اني ابقى وحيد
و لسا برضه بتغيري
و لسا برضه بتغيبي
انا عارف ..
لا ده عيبك و لا عيبي
و بتسهرى و بتفكري
و بتعدي علي ايدىكي
مين اللي باقىلك
و مين اللي هدم نيلك
و صوتك الهادي في كلامك
و رعشة ايدىكي و سلامك
و سؤالك في ايه مالك ؟
و ايه اللي كسر نفسك ؟؟
ل قوله « خلي بالك من نفسك »

و دموعك اللي لحد دلوقت
بالنسبالي بدون تفسير
و سر عشقك لأغاني مُنير

حبیبتي ...
انا عايز اقولك كلمه
بلاش البكا فالضلمه
والقعاع الارض
من امتي الوجع كان فرض !!

انا عرفت ده كله ازاي !
لأنني حبیبتي مُش نساى
و فاهمك اكر من نفسي
انا بوصف فيكي لنفسي ساعات
انا ببساطه واحد حبك
و اول لما حبك - (مات)

«أنصاف الحلول»

انا عقلي اكبر من سني
لكن فـ مشاعري يقولوا خايب
من اول جيم الكونكان
ولحد ورق الشايب ..
الوحده و التوهه
في تلك الفتره ليه كتروا ؟
باقيلي فـ محفظتي تذكرة مترو
و باقيلي ورده بـ ٣ جنيهه
و حظي الوحش يندهلي

و يقولي هاه
نفسك فـ ايه ؟
اقول « هي »
يقولي ازاى ؟
اقوله لأنني مُش نساى
فـ يرد « مغفل » بنسبه ١٠٠ %

برد یناير
و صوت مزيكة عُمر خیرت
و مطره کتير
ولسا عارفه اني بغير ؟؟

حاجات کانت معانداني
و کنا لما نتکلم
صوتها بيهدی و یقطع
و کلامي معرفش بیروح فین ؟
حاجات راحت فغمضة عين

و مین فینا الی رُد الباب ؟
و مین واجه و قال یا عتاب ؟
انا مفارق ..

ازاي و امتي ؟
مُش هقول
عشان مفیش عاقل
بیرضي بأنصاف الحلول !!

«قانون الجاذبيه»

الجاذبيه ..

أهم من جمال الملامح

المنطقيه

مقالتش إنك دائماً تسامح

رسمتك فصفحه بيضا

مُش دليل إنك حبيب

ضحكتك اللي قالوا سودا

مُش دليل إنك كئيب

هي دايره وانت عارف

كنت شايف .. كنت خايف

كنت حالف .. لفيوم تغيب

« ساعة أذان المغرب »

خلص يلا :

– ارجوك استني

خلص يلا :

– ارجوك استني

خايف ليه ؟

– اصلي مُش ضامن الجنه

شكلك كده قاعد تتمني :

– انا مرعوب جداً

سيبها علي الله :

– استني . . استني

ايه ! :

– انا لسا باقيلي في عمري دقيقه

اصل الوقت الضايع خاننا

انا عايز طلب

اطلب ! :

– بس مفيناش مـال الزعل

اتفضل ! :

– انا عايز حُضن من امي
وحياتك سيبنني اطول فيه
انا عارف انه فاضلي دقيقه
لكن سيبنني أعيش الحلم
و لو لقيت حُضنها هيطول
يبقي نعيد سيناريو الفيلم
عبيط اياك ! :

– مُش انت ملاك !
لكنني جايلك و بأوامر:
عايش في الدنيا بتغامر
و جاي دلوقتي تتحسر
حاجات جواك بتتكسر
ولا انت حاسس
و لا اصلاً مُهتم
و فاكر ان الدنيا اهم
– انا والله

من غير ما تقول :
كُنت فين ساعة اذان المغرب ! :
– كُنت ع القهوة
و تفكيرك في البنت اياها ! :
تفكير شهوه

و معرفتك للناس
كانت مصالح
و إليّ قالك سامحني
مكنتش مسامح

حياتك مُش بايدي :
لكن عشان قولت الحقيقه
انا هسيبك الدقيقه
ودع فيها أمك و اخواتك
و جيرانك و اصحابك
و كل حد ساعتها سابك
و صحيانك متاخر
و زعيقك و خناقك
و قلبه البوز ..
و شكلك و انت عجوز
و شبابك و الجامعه
و صورك و الذكريات ..
و بينما كان يُكمل كلامه
بص لهُ - لقي (الوقت فات)

«إلي كل الحاجات الثانيه»

إلي الدنيا
إلي الناس اللي سهرانه
إلي الناس اللي عيانه
إلي القلب اللي حب بجد
و لكل من خايف يودع حد
إلي البنت اللي عاشت
تشتكي من الناس
إلي الدوشة و وجع الراس
إلي الواد اللي عاشق
شئ اسمه مزيكا
إلي كل من مسح
ماضيه بأستيكه
إلي جدو و إلي عمي
إلي من قال شايل همي
و من اول وقعه اختفي
إلي كل شئ ف حياتي اتنفي

و لكل حلم محقققوش
و لكل واحد مفهمتموش
الي كل شئ عادي
الي الجرح . . الي الماضي
و اللي بيعد النجوم بليل
الي عاشق المواويل
الي كل من عاش عشان يحكي
حكاوي ناس كتير تانيين
الي كل من خاف
من البني آدمين
الي كل من دمع
دموع مليانة شوق و حنين
و الي كل الحاجات الثانية
انا عايز أقولك بس
بأن قلبهم لو حس
كانت هتفرق معنا كثير . .

«وصحيت ملقتش بلدي»

يا عزيز عيني – ونا نفسي أروح بلدي
ليه نمت فيها – وصحيت ملقتش بلدي

انا كنت فاكرها سندي !
انا كنت شايف حريه
الطلقه جت في ولدي
و قالولي ملوهش ديه !!
ندرا عليا يا بلدي
انا مُش بايع القضيه ..

يا سيدنا و يا حامينا
بلدنا – ساكنه فينا
يا تري قد الأمانه
ولا هتنوي و ترمينا !

يا عزيز عيني – ونا نفسي أروح بلدي
ليه نمت فيها – وصحيت ملقتش بلدي

عم ياللي عايش
سرقوا منك غوايش
ثم - ضربوك بـ طلقه
ثم - ضربوك بـ قايش !
لساك مُصر برضه
تقولي كلمه يا بلدي !!

في ناس ماشيه بـ حراسه
و ناس فُقرا بـ وراثه
عارف لو كنت ناجح !
كانوا عاندوك غلاسه
و لسا خايفين يا بلدي ..

يا عزيز عيني - ونا نفسي أروح بلدي
ليه نمت فيها - و صحيت ملقتش بلدي

و فجأه لقينا فاجعه
دي الضربه بجد واجعه
انا لو قررت أهاجر
مفيش نيه لرجعه .. !

«تحت عينيها اسود»

سبتلها ايه !
سبتلها الندم
و حبة ألم ..
و تحت عينيها اسود
في التوهه ليل ..
خلتها تسرح بالساعات
خلتها تبكي علي حاجات
خلتها تمشي في الشوارع
من غير دليل !!
حبتني و هي عارفه
اني مليش بديل ..

سبتلها ايه !
سبتلها غربه
سبتلها ذكري
خلتها تمشي
تلعن في بكرة
خلتها كل يوم
تقرالي آخر شات

خلتها تحن لـ مكالمات
خلتها تفتكرني
فبتبكي و بد تسرح

هي عارفه اني انا
قبل منها حبيت ألوف
قالتلي هما حاله
و قلبي حاله ..
قولتلها « نشوف »

و انا ؟
انا قلبي من نيلها شرب
بس عمره ما ارتوي
عرضوه علي ١٠٠ حكيم
و محدش لقاله دوا ..
تلاقيها فاكراني حجر
انا والله مُش حجر ..
انا واحد م الوجع
قلبه انفجر ..

كانوا البنات
يحبوني لـ صمتي
كانوا يموتوا
بس يعرفوا
سر ابتسامتي

اصل انا واحد
شاف كثير
من كتر عشقه للبنات
سموه (وزير)
بس انا حبيت ابتسامتك
حبيت رقتك - ضحكك
و رسمة شفايفك
كنت لفين ما أروح ببقى شايفك

و جواباتي
كانت اسوأ عاداتي
جواباتي اللي جاتلك
أستهلكت ١٠٠ مره قبلك

كنت و انا بكتبها
أيدي بتترعش و بتتنفض
بعتهم لـ ١٠٠ بنت قبلك

و كل مره بدتترفض ..
بس انتي ليه
خدتيها في حضنك
واستنتيها !!

ده انا والله
من كتر ما اترموا
في الدرج
نسيت اللي فيها

و تعبت من كتر
ما استنيت ...
و جيت عليك
اضحك ..
لقيتني - بكيت ..

(المشهد) ...

(واحد بيكلم نفسه و هو علي سطح العماره علي طرف
السور)

«لو رجعت بالزمن»

عدت سنه
و كلهم اتغيروا
واتنكروا
في شكل شئ
تحب انك تخسره

عدت سنه
و كلهم اتفتتوا
واتقسموا ..
راحوا في طريق
خايف بأيديك ترسمه

عدت سنه ..
و قابلتهم فسألتهم
ايه اللي غيركم كده !
والحُضن ليه مبقاش يساع !
هو انتوا بتحبوا الوادع !

كل المباني و الأماكن
و الجرح اللي جوا ساكن
و الكلام و السلام
و الدموع لما بنام
بقت سراب !
كل حاجه عشتها
و صدقتها ..
و بعدها - كدبتها
فحلها اني ارجع بالزمن ..
و لو كنت رجعت بالزمن ..
انا كُنت عملت حاجات كثير
كُنت صحيت الضمير
كنت نمت في حُضن ابويا
و مكنتش أزعل مني اخويا
و كنت اضحك علي ضحك امي
مين غيرها كانت شايله همي !!
و كنت هروح عند جدي

و لما اقباله احضنه
و نلعب شويه و اجننه
و نتكلم كثير ...
كنت هتطمن عليه
و اتأكد انه بخير ..
و كنت هذاكره فتره
قبل ما يبقي في امتحان ..
و كنت هحضن اللي بحبها
عشان محسش اني جبان
و كنت هستري تليفون
و اشوط الكوره جوا الجون
و كنت هبعد عن السجاير
و كنت هقدر حجم الخسائر
و اجيب حقي مـ الي ظلمني
بس لو رجعت بالزمن
انا كنت غيرت الي جاي
كنت زورت كل ركن

كنت زورت كل حي
لكن ربك يسببها

تعيش فالدنيا
علي عيبها ..

تعيش بأرادتك
و في الآخر
هتتحاسب
و كل شئ له تمن ..
فانا خلاص فهمت
و مُش عايز ارجع بالزمن

«مغفل بجداره»

المشهد الأول
قاعد بيكلم نفسه
و بيسأل هيعمل إيه !
تليفون من أقرب صاحب ليه ..
إزيك يا أحمد !
- إزيك يا حسين !
فرح أُختي كمان يومين ... :
لازم تيجي ..
- انا أسف مُش هاقدر أجى
ليه ! :
- اصلها مُش بمزاجي
هزعل منك .. لازم أشوفك
إنسي ظروفك و مشاكلك
- أصلي و فصلي ...
(ملعون) أبو شكلك - بُص :
من غير رغي و تفاصيل :
هستناك يومها علي كورنيش النيل
انا مُش هشبع منك يومها كلام
- مُضطرا قفل دلوقتي
« سلام »

«المشهد الثاني»

قاعد بيكلم نفسه
و بيسأل ..
طيب لو كانت استنت
كان ممكن يحصل ايه !
مُش كان ممكن عدينا خلافنا
و اتجوزنا و خلفنا
و نجيب عيل يقرفنا
و يكبر قدامها و قدامي
و ندلع فيه .. و يقولي
« يا بابا مراتك تعبتني »
و أفضل اضحك ..
لكن تلاقيها دلوقتي نسيتني

تلاقيها معاه سمعت اغنيتنا
و حكيتله حواديتنا
علي اساس انها
(روايات مُختاره)

انا فاشل و مُغفل بجداره

انا تقريباً مُش شايف غيرها
درجة حُبي لتفاصيلها
خلاها سِكنت في عينا
بس اهو فادني بـايه !

تلاقيها هتكويله هدومه
و تتفرج ع الفيلم معاه
تلاقيه بيشكيلها همومه
يضحك ف تقوم حاضناه
تلاقيها نفذت الوعد
اللي ما بينا معاه .. !!

زي ما كُنا متفقين
و متواعدين ...
هي بتفرح دلوقتي
و انا لسا ومازلت بعاني
انا لازم اشوف دكتور نفساني .. !

«المشهد الثالث»

القاعة مليانه بناس

النُص الأول

قاعد بيهزر

و النُص الثاني

قاعد ومكشر

قالبينها بجد

و اهو داخل جوا

مُش عارف حد !!

مستني اللحظه

اللي فيها هيشوفها

و يعاتبها

و يزعق فيها

و يقولها

« انا اكثر واحد حبك »

نسيتي ده كله بسهولة !

قطعتي جواباتنا معقوله !

انا غلطانِ اِنِي حَبِيتُكَ
وَ اسْتَنِيتُكَ - وَ خَلِيتُكَ
جَزءٌ مِنْ تَفَاصِيلِي
وَ شَرِبْتِي مِنْ نِيلِي

بَقِيَّتِي زِيكَ زِي اِي وَاحِدِهِ
نَسِيَّتُهَا وَ مَبْشُوفُهَاش
وَ اَوَّلُ مَا دَخَلْتَ قَدَامَهُ
فَرَحَانَهُ بِفُسْتَانِهَا
قَامَ وَ طَلَعَ بَرَا
وَ عَيْنُهُ فِي عَيْنِهَا
وَ عَمِلَ نَفْسَهُ مَعْرِفُهَاش !!

«البنت بيانو»

البنت بيانو
الحضن مكانها
الدنيا جمالها
السما الوانها
الضحكه منها - بيت
عامّة - و علي كل حال
عندي ليكي ١٠٠ سؤال
هو انتي ازاي حلوه كده !!
هو انتي بشر - متأكده ؟
هو انتي ايه .. انتي نور !!
و ليه ما بينا الف سور !!
و ليه ضحكيتك تبقالني حلم
و قصتنا نفسي تبقي فيلم
و لو هنتخيل حاجات
يبقي ننسي اللي فات
قلبي شاب ماهوش عجوز
و اللي جايز لم يجوز
قلبي حبك انتي فعلاً
بس لما تغيبني فعلاً
ليه ساعتها بيدي بوز؟

« دایماً بتخاف »

و عن إنها دایماً بتخاف
و قلبها - خواف
و بتقلق مِ الي حوالیها
و تقابل ناس تفرحها
و تقابل ناس تبکیها
و تقابل حد تراحله
ولما تتطمئن و ب تبوحله
بیتنطط و یتمرد
ف تغیب الفرحة ف عینیها
و بقت بتحب تسیب دلوقت
و مبقاش فارق معاها الوقت
ولا حاسه و لا بتتکلم
تمام انتي !!
انا بجد تمام
و مُش عایزه کلام
و بجد مُش ناقصه
انا حالفه لـ أُسیب
علشان خایفه أَساب

فداعيش فدعذاب
فانا خايفه احب و اتعلق
و في الآخر
تسوّد الدنيا فديوني ..

نصيحة لقلبك الطاهر
متاخذيش حد بالظاهر
و سيبك مِاللي بيسييك
و خلي الفرحة فديونك
و سيبك مِاللي بيخونك

و حبي الدنيا
دهِ اللي يحبك يتمني
يشوف فديونك الجنه
و اكرت مِاللي يحلم بيه
هيشوف فيكي ميزات تانيه ..

«كالفراشه في برطمان»

هو !!

هو صحيح محبش بنات

بس من طبعه السكات

هو كان شئ غريب

لو يقرب - راح يسيب

بس دائماً كان جدع

يمكن من كتر ما اتوجع

الحنين مكتفه ..

برد الشتا بينسفه

طب مين عليه !

ومين معاه ينصفه !

يمكن كان طيب من سنتين

و مكانش زي كتير خاينين

ف البنات حبته

و عشقته و ماتت عليه

بس هو عايز ايه ؟
هو عايز الامان
بس مش لاقى المكان
يعني مش عايز ف مره
لو تهور و بص بره
يحس انه . . كالفرشه ف برطمان

«أثار جانبیه للمهدئات»

انا !!!

انا اولي بنفسي من غيري
انا مُشِ حملِ اني اتوجع تاني
انا واحد مالفراق صدي
و قلبه مات من الخضه
و عاش طول عمره بيعاني !!

الوجع جوايا ساكن ..
سبت المباني و الأماكن
و عيشت فتره ع المهدئات
انا كل شئ جوايا مات
برد الشتا .. و النكات الملفته
و الحواري و الصحاب
و فد كل مره قلبي داب
كل دول كانوا شواهد
اني كنت في يوم برئ
كل دول فعلاً نسيتهم
لما كرهت كل شئ

«امضاء المجني عليه»

تحياتي
و اما بعد ...
بقالنا كتير
بعيد عن بعض
لكن لسا برضه
هيفضل وجودك
مسبيلي ضيقه
لأنني ببساطه
رفضت الحقيقه
و كنت بشوفك
حُضن و مرسِي
و ملقتش حل
غير اني اقدر انسي
و أديني فضلت أهدد
و أحذر و أشدد
و فكرت لساعات
و كركبت درجي

و كدبت برجي
و حبيت السُّكَّات
هتفضل دماغي
تعاكسِك - تلاغي
تلمح و تبعد
و قلبك بيعند
و قلبي يمل ..

مفيش ليكي حل
غير انك تغيبني
و هاقبل نصيبي
و هنسي في غيابك
انا قفلت بابك ..

و لا يمكن افكر
منك اقرب
انا قلبي جرب
و شاف ياما منك

جنانِكَ و غيرَتِكَ
بعادِكَ و حيرَتِكَ
كلامِكَ سُكَّاتِكَ

انا في النهايه
خارج من حياتِكَ
انا كسبت ايه
كسبت احترامِكَ

امضاء ...

المجنني عليه

«العندليب»

عبد الحليم كان صوته حلو
عاش يغني للي غايب
سمعتله بأمر الحب !
ولا احضان الحبايب !
ولا صدفه و بلاش عتاب
و صوره و ما بينا ميعاد
ولا سواح و لست قلبي
ولا علي حسب و داد !

« لو اني اعرف خاتمتي – ما كنت بدأت »

بيسابق الوقت
و الخوف جواه
اعراض الوحده
كانت لسا معاه

إثنين عشاق
بيناموا علي أغانيه
و هو مبینامش !
خلي الناس كلها تحلم
و هو میحلمش ..

فجأه عدي النهار
و ضَرب الاستعمار
خلي الدنيا اتأزمت
سكت الكلام فجأه
و البندقیه اتكلمت

بیغني كثير للحب
زي احساس
إلي حب
و زي احساس
إلي یتمناه ..
عاش و مات
بیدور علیه

و لا قدر يلقاه
كل كلمه ع المسرح غناها
كان بيكلم قلبه و إحساسه
مزيكته كانت اهله و ناسه
و أثر الفراق بان لما سابها

الحقيقه بكل ما فيها
من حاجات حلوه
متنفعش إلا صاحبها

كانت حافظه مواعيده
كانت ماشيه ايدها فـاـيـده
قالوا حب في آخر ايامه
لكن فجأه ..
حبيبته اهي ماتت قدامه
كل شئ راح و في ثانيه
كان عايز كل حاجه مـالـدنـيا
و الحب الـلي فضل يغنيه ..

آخر كلام قاله
ميهمنيش أموت دلوقت
ميهمنيش اموت بكره
يهمني لما اموت
اكون سايب ذكري

عبد الحلیم كان صوته حلو
عاش يغني للي (غايب) ..

«مُش عايز حاجه»

انا بعترف
إني كدبت السعاده
وإني صدقت العياط
وإني لما كسبت حاجه
خسرت قُدامها حاجات ..
وإني شوفت الصفحه بيضا
لما كنتي في يوم معايا
وإني حسيتك عنيده
لما كسرتي المرايا
وإني لما غيبت عنك
جيتي و خدتيني في حُضنك
و ساعتها حببت السُكات

انا عارف إنك إنتي
راضيه عشاني
إنك تعاني ..

وَإِنِّي بَطَلْتُ السَّجَائِرَ
يَوْمَيْنِ - ثَلَاثَةً وَ رَجَعْتُ تَانِي

وَإِنِّي حَلَفْتُ هَبْقِي أَحْسَنَ
وَإِنِّي كَذَبْتُ لَمَّا وَعَدْتُكَ
وَإِنَّكَ يَا مَا صَبَرْتِي عَلَيَا
وَ سَامَحْتَنِي زِي عَادَتِكَ

شَايَفَانِي لِيَهْ إِنِّي أَنَا طَيِّبٌ !
أَنَا مُشٌ طَيِّبٌ وَلَا حَاجَهُ
أَنَا خَائِبٌ جَدًّا عَلَيَّ فَكْرَهُ
مُشٌ بَعْرِفَ احْفَظْ عَ الْحَاجَهُ
أَنَا شَيْءٌ مَوْجُودٌ - فِي طَرِيقِ مَمْدُودٍ
أَنَا عَايِشٌ عَلْشَانِ (وَلَا حَاجَهُ)
أَنَا عَايِزٌ حَاجَهُ وَ مُشٌ عَايِزٌ حَاجَهُ
أَنَا فِي الْآخِرِ مُشٌ مَسْتَاهِلِكُ
لَأَنِّي أَنَا تَقْرِيْبًا وَلَا حَاجَهُ !

«جواب تعيين من الآخره»

في يوم قاعد علي القهوه
و جالي اوام جواب تعيين
و كان مكتوب ..
ازورهم لاجل اسد الدين
علي المذكور
يشرفنا في اقرب وقت
انا ما صدقت ..
اخيراً جه .. خلاص هرتاح
من الناس اللي مغروره
و عايشه جوا كام صوره ؟

في ناس طريققتها حدوته
و ناس عايشه و مبسوطه
و ناس تطمع .. !!
و ناس بيتها غنا و افراح

اخيراً جه .. خلاص هرتاح
من الناس إلهي خنقتني
وودتني ..
لـسكه كنت معرفهاش
فدروحت بلاش ..

وهنسي خلاص
حببتي إلهي نسيتني
و أهـي دلوقت مخطوبه
وفرحها كمان ٣ اسابيع
انا كنت معاها بضيع ..
و خدتني الدنيا علي سهوه
سمعت في مره عن بنت
بتحبك بس عشان شهوه !

اخيراً جه .. خلاص هرتاح
خلاص هودع الأتوبيس
و عم خميس ..
و طابور العيش
و غموسي الحاف

و همضيلهم بقلمي الجاف
و هرمي في وشها الدبله
و مُش راجع ولا نفسي
و هتشوفني علي القبلة
بقرا الفاتحه علي نفسي
لقيت في آخر الورقه ملحوظه
و كان مكتوب ...
كل الناس بتتجمل و فيها عيوب

قلوبهم سودا مرعوشه
و ضحكه صفرا مغشوشه
فبلاش تمشي فسكتهم
و لا حتي تعديها ..
لقيت الامضا مكتوب فيها ..

جواب تعيين من الآخره ..

« ٢ / ٢٢ »

بعد الصلاه و التسليم ..

إِلَيَّ حَبِيبَتِي « مِيم »
إِلَيَّ الْأَلْغَازِ
إِلَيَّ الْأَعْجَازِ
إِلَيَّ الْغَيْرِ
إِلَيَّ الضَّحْكَه
إِلَيَّ التَّكْشِيرِ

إِلَيَّ حَبِيبَتِي
إِلَيَّ قَالُوا شَاطِرْ
إِلَيَّ الصُّدْفِ
إِلَيَّ « الْمَطْرَه »
إِلَيَّ الْوَرْدِ
إِلَيَّ الشَّيْكَوْلَاتِ
و غَزَلَ الْبَنَاتِ

إِلَيَّ الضَّحْكَه دِي بِالذَّاتِ
إِلَيَّ عَيُونِهَا

إِليّ هُما راس مالي
و من غيرهم انا معيش
إِليّ مشيتنا علي الكورنيش
إِليّ دمعها الِلي منزلتش
و انا واقف و متهزتش
إِليّ حبييتي « ميم »

إِليّ قالت انا سامعاك
و بكون مبسوطه و انا وياك
إِليّ غيرتها المستخبيه
إِليّ قولة « في ايه مالك !
و لو صدفه أبص لـ بنت
تقولي « اروح اكلمهالك !

إِليّ طموحها
إِليّ روحها
انا اي حد يجرحها
كأنه ضربني برصاصه

البنت لو طفله فـ عيونك
راضيهـا بـ ورده و مصاصه

سَلَامٌ لِلَّذِينَ أَحْبَبْتَهُمْ عِبَادًا
سَلَامٌ لِلَّذِينَ يَضِئُ لَهُمُ جَرَحِي ...

تت

« تَحْتَ عَيْنَيْهَا اسْوَدَّ »
أشعار بالعامية

للكتاب
محمود عدلي



Mohamed El Sahhar

ZERO ONE PICTURES

Production solutions that make sense.

زيرو وان بيكتشيرز للتوزيع - أحمد فخري - مدينة نصر - القاهرة
تليفون : 01285829109 - 01090288777

E.mail: Zeroonepictures@outlook.com

Zeronepictures.com

website: www.zeronepictures.com

© جميع الحقوق محفوظة، وأي اقتباس أو إعادة طبع أو نشر في أي صورة كانت ورقية أو إلكترونية أو بأية وسيلة سمعية أو بصرية دون إذن كتابي من الناشر؛ يعرض صاحبه للمساءلة القانونية.